



Inatsiartunut ilaasortaq Storm Ludvigsen
-/Maani

Inatsisartuni ilaasortap Storm Ludvigsen-ip, Inuit Ataqtigiit, Naalakkersuisunut apeqqutaanut akissutit.

Dato: 8. januar 2010

Postboks 1601
3900 Nuuk
Oq/tel +299 34 50 00
Fax +299 32 56 00
isiin@gh.gl
www.nanoq.gl

Inatsisartut suleriaasianni § 36, imm. 1 naapertorlugu Naalakkersuisunut imaattunik apeqquteqarputit:

1. Piumasarineqartut suut najoqqutaralugit kisitsisillu eqqortuunissaat qulakkeerumallugu suliffissaaleqisut amerlassusaat kommuninit qanoq nalunaarutigineqartarpat, tamatumani Naatsorsueqqissaartarfimmut nalunaarutigineqartartut aamma ilanngullugit ?

2. Kommunit kisitsisinik nalunaarsuisarnerat eqqortuunersoq Naalakkersuisut qanoq qulakkeersimavaat ?

Naalakkersuisut apeqqutitit 1 aamma 2 ataatsimoortillugit akissuteqarfigissavaat, imaattumik:

Suliffeqarnermi innersuussisarneq il.il. pillugit Inatsisartut peqqussutaat nr. 10, 18. december 2003-meersoq naapertorlugu kommunalbestyrelsi pisussaavoq suliffeqarnermut tunngasunik eqeersimaartumik ingerlatsinerneq atavillugu kommunimi suliffeqarnermi ineriartorneq malinnaaffigissallugu, tassungalu ilanngullugu kommunimi suliffeqarneq pillugu paasissutissat katersussavai nalilersorlugillu, paasissutissallu tamakkua Naalakkersuisunut nalunaarutigisassallugit.

Namminersornerullutik Oqartussat nalunaarutaanni nr. 17-imi ulloq 16. oktoberi 2007-imeersumi Piareersarfinni qitiusumik ingerlatsiviit suliaminnik ingerlatsinerat il.il. naliliisarneq pillugu kommunini suliffissarsiuussisarfiit aamma pillugit § 6-imi erseqqissarneqarpoq, kommunalbestyrelsip suut akisussaaffiginerai, tassunga ilanngullugit:

- Suliffissaaleqisut qassiuneri
- Suliffissaaleqisut qassit suliffeqarnermi sulilernissamut piareersimasuunersut
- Suliffissaaleqisut qassit sulilernissamut innersuunneqarsimanersut
- Suliffissaaleqisut qassit suliffeqalersimanersut

§ 7-imi aalajangersarneqarpoq kommunalbestyrelsip isumannaassagaa paasisutissat nassiunneqartut eqqortuuneri nutaajunerilu.

Suliffeqarnermut, suliffissarsiortut ilinniagaqalerniartullu sulilersinneqartarnissaannut kiisalu Kalaallit Nunaannut suliarortartunut tunngasunik kommunalbestyrelsit paasisutissanik nalunaaruteqartarnissaat pillugu Namminersomerullutik Oqartussat nalunaarutaat nr. 20 19. novembari 2007-imeersumi suli annertu-nerusumik itisileqqinneqarpoq nalunaarutigineqartussat sunik imaqartussa-nersut. Tamatumalu saniatigut § 4-mi aalajangersarneqarpoq "kommunalbestyrelsip isumannaassavaa nakkutigalugulu paasisutissat nassiunneqartut kukusuunnginnissaat paatsiveerusaataannginnissaallu".

Kalaallit Nunaanni naatsorsueqqissaartarfimmut kisitsisinik paasisutissanik nalunaaruteqartarneq pillugu aalajangersakkat Naatsorsueqqissaartarfik pillugu Inatsisartut inatsisaanni nr. 11-imi, 29. oktobari 1999-imeersumi atuarneqarsinnaapput, Kalaallit Nunaanni naatsorsueqqissaartarfik kisitsisinut paasisutissanut qitiusumik oqartussaasuvoq, ilaatigullu makkuninnga suliassaqartitaalluni:

- Paasisutissanik katersinissat, suliarinninnissat misissueqqissaarnissallu siunertaralugit periutsinik ineriartortitsissalluni.
- Paasisutissanik tunniussisartut attuumassuteqartut atuisullu suleqatigalugit kisitsisitigut paasisutissat tunngaviusut amerlisarneqarnissaannut kisitsisitigut tunngavissat pissarsiariniarneqartarnissaat isumagissallugu.
- Pisortat oqartussaasuisa nalunaarsuiffiisa, pisortat inuussutissarsiortullu allaffissornikkut suliaminnik ingerlatsinerannut atorneqartut, kiisalu kisitsisitigut paasisutissiornermut atorneqarsinnaasut, aaqqissuunnerini atorneqarnerinilu isumaginittuusaaq peqataalluniluunniit.

Taamaattumik kommunit akisussaaffigaat isumannaassallugu kisitsisit paasisutissat suliffissaaleqinermut suliffeqarnermullu tunngassuteqartut tamakkiisuunissaat pissutsinillu ersersitsisuunissaat. Kalaallit Nunaanni naatsorsueqqissaartarfik kisitsisinut paasisutissanut attuumassuteqartuni pisorta qarfiuvoq oqartussaasoq, kommuninullu siunnersuisinnaasoq, kisiannili aamma piumasaqaateqarsinnaasoq.

Naalackersuisut arajutsinaveersaartarpaat pilersaarusiornermi aalajangiinissanilu pitsaanerpaanik sakkussaqaarnissaq, sumiiffinni ataasiakkaani aammalu qiti-usumik ingerlatsinerni, inuussutissarsiornermut suliffeqarnermullu ineriartortitsi-nermut tunngatillugu. Nunap immikkoortukkaartumik anguniagassat pilersaarusi-orneqaarnissaannut tunngatillugu aamma apeqqutit pineqartut eqqumaffigineqas-sapput.

3. Inuit sulerusussuseqanngitsut imaluunniit suliffimmik innersuunneqara-luarlutik suliumanngitsut, kommunit ilaannit suliffissarsiuussisarfinniit isu-maginninnermi allaffeqarfinnut innersuunneqartalersimapput. Nunatsinni sulisinnaassuseqartut tamaasa atorfissaqartinneqarneri eqqarsaatigigaan-ni, peruserineqalersimasoq tamanna Naalackersuisunit eqqarsaatigeqqis-sallugu pissutissaqalersitsiva ?

4. Kommunini assigiinngitsuni inuit suliffissarsiuussisarfinniit isumagin-ninnermi allaffeqarfinnut innersuunneqartalersimanerat Naalackersuisunit ilisimaneqarpa ?

5. Suliffissaaleqisut sulisinnaassuseqarluartut suliffissarsiuussisarfinniit isumaginninnermi allaffeqarfinnut innersuunneqartalersimanerat Naalak-kersuisut naleqquttuusoraat ?

Naalackersuisut apeqqutit 3, 4 aamma 5 ataatsimoortumik imaattumik akissu-teqarfigissavaat:

Naalackersuisunut ersarissumik anguniagaavoq Kalaallit Nunatta sapinngisamik sulisussaqaarnikkut imminut pilersortuunissaa, taamaattumillu sulisinnaasut sa-pinngisamik pitsaanerpaamik iluaqutigineqarnissaat siunertaavoq.

Naalackersuisut attaqqivaat kommunalbestyrelsit ataasiakkaat namminneq Inatsisartut peqqussutaannik ataasiakkaanik atortitsisussaammata, kisiannili aamma tassunga atatillugu kommunalbestyrelsit namminneq aalajangersartas-sagaat allaffissornikkut ingerlatsinerup ingerlatsivinni il.il. qanoq aaqqissuun-neqarsinnaanera.

Kommunalbestyrelsip innuttaasut ataasiakkaat qanoq ikiorsertariaqarnersut aala-jangiiffigisinnaajumallugu innuttaasunik ataasiakkaanik qanoq ikiorserneqarnis-samut innersuussisassaaq. Pisortanit ikiorsiissutit pillugit Inatsisartut peqqus-sutaanni maanna atuuttumi, nr. 15-imi, 20. november 2006-imeersumi § 9 naa-pertorlugu kommunalbestyrelsi pisortanit ikiorserneqarnissamik aningaasartuuti-lu aalajangersimasut matussutissaqartinneqarnissaannut qinnuteqartoqartillugu pisussaavoq nalilersuinermik tunngaveqartumik innersuussinissamut, qinnu-teqartoq pisortanit ikiorserneqartussatut, suliffeqanngikkallarnermi ikiorsiissutinik pisartaqartussatut imaluunniit ikiorsiissutinik naleqquttunik allanik pisartaqartus-satut innersuunneqassanersoq aalajangiiffigissallugu.

Siunnersuineq pisartagaqartinneqartussamut atugassarititaasut ataatsimut ta-maasa eqqarsaatigalugit ingerlanneqartussaavoq, pilersuisinnaassuseqanngik-kallanera kisiat pinnagu. Siunnersuineq tassaasinnaavoq oqartussanut allanut attaveqarnissamut ikorsiineq, assersuutigalugu suliffissarsiuussisarfinnut, katsorsaavimmut peqqinnissaqarfimmut inissiaatileqatigiinnulluunniit.

Piomasagaataavoq qinnuteqartoq pisortanit pilersorneqarnissamut tunngasumik aningaasartuutinullu aalajangersimasunut ikiorserneqarnissamik qinnuteqarner-

minut atatillugu tamanna suliffissaaleqinermik tunngaveqarsimappat suliffissarsiuussisarfirmut suliffissaaleqisutut nalunaarsimasuussasoq, suliffissamik inner-suunneqarnissaq siunertaralugu. Taamatuttaaq ikiorserneqarsinnaanermut piumasaaqaataavoq qinnuteqartup sulileqqinnissaq siunertaralugu sungiusarnissamik neqeroorutaasumik naapertuuttumik tigusinissaa. Piviusulli imaapput; neqeroorfigineqartut ilaqartarmata suliffeqaleqqinnissamut piareersaataasumik suliniutaasumik neqeroorfigineqarnermik imaluunniit suliffissamik innersuunneqarnermik tigusiumanngitsunik. Tamatumunnga pissutaasartut inummiit inummut assigiinngitsuusinnaapput.

Inunnik isumaginniffimmiit suliffissarsiuussisarfirmut killormulluunniit innersuussisoqartillugu pingaaruteqartuusarpoq ikiorsiinerup pineqartumut immikkut naleqqussakkamik aaqqissuunneqarsimasarnera. Ikiorserneqartartut ilaqarput sulinnaannginnermik peqquteqartumik, suliffissanut naleqqussarsinnaannginnermik peqquteqartumik imaluunniit peqqiilliuuteqarnermik peqquteqartumik suliffissamik atugassarititaasut nalinginnaasut aallaavigalugit tiguisinnaasannngitsunik. Taakkuuppullu inunnik isumaginniffimmut innersuunneqartariaqartartut, tassani isumaginnikkut siunnersortinit atorfeqartinneqartunit siunnersorneqarnissamik pisariaqartitsisuusut, inuit ataasiakkaarlugit anguniagassaannik pilersaarusiorsinnaasunik. Amerlanertigullu taakkuusarput suliffeqaleqqinnissamut piareersimasuunngitsutut nalilerneqartariaqartartut. Inuit uani pineqartutut inissisimasut pikkorissarnissamik, katsorsarneqarnissamik, fag-inut ataasiakkaanut pikkorissarnissamik assigisaannilluunniit iliuuseqarfigineqarnissamik neqeroorfigineqartussaagajupput, suliffeqarnermut uteqqinnissamut periarfissaqaleqqinnissaat aqcutissiuunniarlugu.

Taamaattumik Naalakkersuisut siunertaqarput sapinngisamik kommunit amerlanerit 2010-mi angumeriniarneqassasut, sulisorisat suliffissaaleqinerup iliuuseqarfigineqarnissaanik siunertaqartumik inatsisinik atuuttunik tunngaveqartumik pikkorissarneqarnissaat isumagineqarsinnaaqullugu. Taamatuttaarlu suliffissaaleqisunut inuttut ineriartormik siunertaqartumik pikkorissartitsisarnissanik pilersaarusiortoqarpoq, suliffissaaleqinermiit suliffeqarnermut pineqartut ikaarsaartinneqartarnissaannik siunertaqartumik. Aamma siunertaavoq sulisorisat pisariaqartitsisut inuttut ineriartormik pikkorissartitsinernut peqataatinneqartarnissaat.

6. Suliffissaaleqisut sulisinnaassuseqarluartut isumaginninnermi allaffeqarfinnut nuutinneqaannarsimasut siunissami suliffissaarusimasut nalunaarsuiffiannii-ginnarnissaat qularnaarniarlugu Naalakkersuisut qanoq iliuuseqalersaarpat?

Sulisinnaasut pineqaraluarpataluunniit, assersuutigalugu sulisinnaasut isumaginninnermi ingerlatsivimmut suliassanngortinneqarsimasut, - suli piumasaaqaataavoq, qinnuteqartut suliffissaaleqisuunerat tunngavigalugu suliffissarsiuussisarfirmi suliffissarsiortutut suliffissamik ujarliunneqartutut nalunaarsorneqarsimassasut. Taamaasillutillu suliffissaaleqisut allassimaffianni takuneqarsinnaapput.

Neriuppunga siuliani saqqummiussakka tunngavigalugit apeqqutigisatit Naalakkersuisut sinnerlugit akissuteqarfigisimallugit.

Inussiarnersumik inuulluaqqusillunga

Ove Karl Berthelsen

Inuussutissarsionermut Suliffeqarnermullu Naalakkersuisoq